



Ruina Tschanüff sper Ramosch.

BERGGEIST / PIXELIO



Chastè da Tarasp – l'ensaina da l'Engiadina Bassa.

SCHWIZER / PIXELIO

## Turs e chastels da l'Engiadina

■ **L'Engiadina n'è betg ina val cun tantas turs e chastels sco la Tumleasta u autras valladas grischunas situadas pli a bass. Chastels e fortezzas èn numnadamain da chattar en grond dumber be en vals pli chaudas e fritgaivlas. Ma i na dat nagin'otra vallada impurtanta en Svizra ch'è situada en ina tal'auzezza sco l'Engiadina.** Perquai fruntan ins da Martina al Lai da Segl tuttina sin ina buna dunsaina da mirs, ruinas, turs abitadas, fortezzas – e sin in chastè d'ina bellezza extraordinaria. Ma cumenzain noss gir oradim l'Engiadina Bassa...

### En la part inferiura da l'Engiadina Bassa

**Ruina Serviezel (Martina):** Restanzas d'in chastè bain constrüi sa chattan gist sper Martina en Val Gronda sin 1100 m. La ruina da Serviezel – documentada era en furmas sco Sanviz u Ser Guitzel – è situada gnanc 100 m sur la



via. Ins na sa bunamain nagut da si'istorgia. Analisas da la maula han mussà che Serviezel era abità gia enturn 650 fin 700 s.C. e quai da Romans. La fortezza controllava la val stretga e guardava vers ils Averts (Norbertshöhe), il vegl passadi vers Danuder (Nauders/Tirol) e vers il Pass da Raisch (Reschen), in passadi che n'era betg privlus.

**Ruina Tschanüff (Ramosch):** Aut sur la chavorgia da la Brancla, al vest da Ramosch, dominescha la ruina Tschanüff dals signurs da Ramosch, funcziunaris da l'uvestg da Cuir, la val. Il num deriva probablmain da «chasa nova». En il 13avel tschientaner era il chastè da grond'impurtanza strategica. Durant la «Guerra da las giaglinas» il 1475 è el vegnì arsentà dals Austriacs. Suententer sia reconstrucziun è il chastè vegnì surdà a las flommas dals signurs sezs durant la Guerra svabaisa, l'onn 1499, avant ch'ils Austriacs vegnian. El è puspè vegnì reconstrüi. En il 16avel tschientaner è il chastè da Tschanüff danovamain vegnì incendià dals Ramoschans

ch'al han dentant era stüi reconstrüi. L'onn 1606 è el puspè daventà victima da las flommas. Suententer la davosa reconstrucziun è il chastè vegnì destrüi bunamain dal tut durant la Guerra da trent'onns. A partir da l'onn 1780 han ins surlaschà la ruina a sasezza.

**Chastè da Tarasp:** En il temp roman era vegnida constrüida qua ina tur. Sin ses fundament è vegnì bajegià l'onn 1040 il chastè da Tarasp sut Ulrich I, cont da Milaun. Il 1173 è morta ora la dinastia dals signurs da Tarasp. Il chastè è passà sco feud episcopal als signurs da Reichenberg en Val Müstair. Pli tard èn daventads possessurs ils chastellans da Matsch en il Vnuost (1239 fin 1464) e cont Friedrich VII da Toggenburg (1422 fin 1436). Lura è il chastè vegnì en possess dals ducas da Tirol (1464 fin 1686). Quels na s'interessavan dentant betg fitg per il chastè. Quel ha pers si'impurtanza ed è daventà ina simpla fortezza cun ina pitschna garnischun. Tranter l'onn 1686 ed il 1803 è il chastè stà en possess dals prinzis da Diedrichstein a Nicolsburg en Moravia/Mähren. En quel temp è el crudà en emblidanza.

La finala ha Napoleon, avend batti ils Austriacs e pudend disponer dal possess moravian en Engiadina, surdà il chastè il 1803 al chantun Grischun. Il Chantun n'è dentant betg stà fitg entusiasma – l'enorm edifiz è crudà ensemen, tut ils bains movibels èn svanids. La finala ha il mastral Marchi da Scuol cumprà il chastè l'onn 1829; ses successur è daventà il cusseglier nazional Andreas de Planta.

L'onn 1900 è vegnì August Lingner, in fabricant da Dresden, a Tarasp a far cura. El è stà uschè intgantà dal chastè ch'el ha cumprà quel anc il medem onn. Lingner ha laschà renovar radicalmain il bajetg, al endrizzar cun mobiglia custavla e render abitabel. Las lavurs ch'han cuzzà diesch onns han consumà milliuns. Diesch dis avant la festa d'inauguraziun planisada – ils 5 da zercladur 1916 – è Lingner mort. Friedrich August III, il davos retg dals Saxons, fiss stà ses ertavel. Ma la finala ha il segund ertavel, il gronduca Ernst Ludwig von Hessen, surpiglià l'ierta. Ses figl, prinzi Ludwig, e sia dunna princessa Margaret han lura tgirà vinavant il possess.

La part la pli custavla dal chastè da Tarasp è senza dubi la chapella da l'onn 1040. Ma era la sala da mangiar dal 16avel tschientaner e la stanza dal chapitani cun la tavladira extraordinaria èn d'ina bellezza remartgbla.

### Dad Ardez fin Zernez

**Chastè da Steinsberg (Ardez):** El è situà sin in grip a l'ost da la vischnanca dad Ardez. La tur grossa che dominescha la vischnanca appartegnava ad in chastè, dal qual ins po vesair be anc restanzas dals fundaments e miraglia. Steinsberg è vegnì constrüi enturn l'onn 1100 dals signurs svebais da Frickingen amez ina fortezza da fugia pli veglia. Da quella è oz da vesair mo anc las restanzas da la baselgia da S. Glièzi. Ils da Frickingen possedeavan vast territoris che tanschevan fin a Bulsau. L'onn 1200 ha Albert da Frickingen vendì il chastè a l'uvestg da Cuir Reinher von Torre. Suententer diversas midadas da maun è il chastè vegnì en possess da Baltasar Schegg, in um d'Ardez che regnava sco chastellan e che n'ha betg survivì la Guerra svabaisa (mars 1499). Il colonel austriac Alois Baldiron, numnà Baldirun, ha destrüi il chastè e deportà il patrun a Meran, nua che quel è vegnì executà. Oz è il chastè en possess da la famiglia Planta-Wildenberg. Cun agid da la vischnanca e da la Protecziun da la patria è el vegnì restaurà a moda exemplarica e salvà uschia da la ruina. Sco ulteriur object ad Ardez è da menziunar la tur Vonzun (La Praschun) che sa chatta a l'ur dal vitg.

**Fortezza Chaschinas (Susch):** A l'ost da Susch, circa 130 m sur il vitg, s'auzan trais imposants muts grippus: Chaschinas, Patnal e Chaschlinas. La vopna da Susch musa ina muntogna cun trais pizs sin fund d'argient; trais pizs cun trais turs nairas. Quels regordan al fatg che mintga mut possedeava oriundamain sia tur. Si Chaschinas ves'ins anc inqual restanza d'ina fortezza moderna, ma nagins fastizs d'ina fortezza dal temp medieval. La ditga raquinta d'in signur tirannic che schicnava ils da Susch. Duca Henri de Rohan ha fatg eriger l'onn 1635 in mir enturn la fortezza.

Al pe da Chaschinas sa chatta la tur da Planta. Quella è vegnida transfurmada di-

versas giadas. Ussa porta ella in tetg da tschagula. A l'ur dal vitg sa chatta in'ulteriura tur, numnada er quella – sco ad Ardez – La Praschun.

**Chastè da Wildenberg ed ulteriuras turs a Zernez:** Il chastè da Wildenberg è dapi il 1956 en possess da la vischnanca da Zernez e furma bain la pli nobla «chasa communal» da tut l'Engiadina. El è per fortunà vegnì schanegià dal terribel incendi da l'onn 1872. La tur abitada existiva gia il 1280 sco sedia dals signurs da Wildenberg; lur chastè da famiglia sa chattava sut Falera. Per in tschientaner è stà l'uvestg da Cuir possessur dal chastè, lura è quel passà tranter il 1400 ed il 1850 en ils mauns d'ina part da la gronda famiglia Planta e finalmain a la famiglia Bezzola. Il chastè ha in pitschen iert cultivà cun premura, bellas stivas da sember, imposantas salas al plaunterren ed a l'emprim plaun, salas cun bellas picturas e stuccaturas finas.

A l'ur sid da la vischnanca s'auza la tur dals Moors dal 12avel tschientaner. Ella è stada abitada da la famiglia Moor dal 1244 fin il 1570, lura è ella vegnida duvrada sco praschun. Oz è ella en possess privat. A l'ost da Zernez, a l'entschatta da la via vers il Pass dal Fuorn, è situada la ruina d'ina tur da guardia da trais plauns cun num La Serra.

### Turs e chastels en l'Engiadina Ota

**Tur da Planta (Zuoz):** Arrivond da l'Engiadina Bassa vers Zuoz dat en egl la tur dals Planta a sanestra da la via, curt avant il center dal vitg. Ins na sa nagut segir da si'istorgia. En il 13avel tschientaner era ella probablmain la sedia d'in represchentant episcopal. L'onn 1750 ha Johann Baptista de Planta, colonel d'in regiment grischun en Olanda, integrà la tur en sia chasa-palaz. A Zuoz duain avair existì en il temp medieval diversas turs d'abitar.

**Ruina Guardaval (Madulain):** L'onn 1251 ha l'uvestg Volkhart von Neuburg laschà constrüi sin in grip sur la vischnanca da Madulain in chastè ch'aveva la funcziun d'ina staziun da dazi. Da quel temp manava la via dal Pass da l'Alvra a l'ost ed al nord sper il chastè. Qua residavan ils funcziunaris episcopals ed incassa-

van ils dazis e las taglias. Il bainstar dals purs dependeva savens be dad els. La legenda relata d'in tiran ch'era activ enturn l'onn 1420 si Guardaval. El na pretendeva betg be impostas exageradas, mabain savens era las figlias dals purs. Uschia era la figlia dad Adam da Chamues-ch. Quel è sa rendì ensemen cun ils purs da la vischnanca e da las vischnancas vischinas, sia figlia oravant, vers Guardaval, nua ch'il signur ha vulì sa patrinar da la matta. Ma qua ha Adam da Chamues-ch tratg il stilet e mazza il tiran, entant ch'ils auters umens han mess or da pes ils famegls e mercenaris; il chastè han els surdà a las flommas. Ils purs eran sinaquai libers ed Adam da Chamues-ch è daventà l'erox da l'Engiadina. Ma i na dat nagins documents che cumprovan la vardad da quest'istorgia. Il chastè è vegnì surlaschà a sasez vers la fin dal 14avel tschientaner. A la fin dal 17avel tschientaner era el gia en ruina.

**Tur Spaniola (Pontresina):** Sur Giarun, che furma ina da las parts veglias dal vitg da Puntraschna, sa chattan restanzas d'ina tur d'abitar che datescha dal 13avel tschientaner. Documents en scrit n'èn betg avant maun, ma probablmain furmava la tur la sedia dals signurs da Pontresina, documentads en il 13avel e 14avel tschientaner. Dapi il 15avel tschientaner n'è la tur betg pli abitada. Il num odiern, Spaniola, cumpara ca. a partir dal 18avel tschientaner. Tranter Puntraschna e Celerina sa chattan plinavant las paucas restanzas da Chastlatsch ch'era probablmain la sedia da la famiglia Murell da Celerina.

**Chastè da Segl:** Sper Segl sa stenda ina lunga peninsla en il Lai da Segl. A la fin da quella s'auza in pitschen spelm cun ina ruina – restanzas d'in pitschen chastè. Da si'istorgia n'existan naginas novas documentadas.

### La presentaziun:

Dossier «Turs e chastels en Engiadina».

### Dapli infurmaziuns:

chatta.ch/?hiid=3086  
www.chattà.ch



Chastè da Wildenberg a Zernez.

PD



Tur Spaniola sur Puntraschna.

PD